

師伏堂駢文二種

序

夫虎豹蔚姿光彪炳其彩鳳雀挺質羽翮振其儀故聖道
所崇尊經攸著士儒之論文詞爲宗是以馬班有作歷七
古而洪暉揚枚索篇卓犖本之彌曜導原吐芽間見秦策
開基峻宇厥惟漢氏赤龍興規石渠講藝白虎聚論通德
載編時則學官旣立經師相承雖意重樸敦未專文道而
詞旨古質自蘊淵和子政校書敘錄最美穉圭上疏封事
爲佳康成箋禮劭公解經雖曰注體迺屬奧文蓋當時經
學文章相輔而行故體渾奇偶格律高上漢書所載別子
所紀彬彬稱盛焉魏晉而下厥道逾彰齊梁迭承罕見散

體故斯格獨脩雅尚適古沈約任昉之徒文通明遠之輩
鏟迹幽谿鑿芳靈囿允資宗尚難其儕矣沿及徐庾其流
豢靡綜斯以降有三憾焉自昌黎起於唐自謂力揅衰敝
宋人繼之始立派名人習古文無復晉宋之美旨趨平易
頓改勁奧之觀元明而下咀習空聞性理爲護身之符語
錄卽名世之作非特漢人注疏咸歸掃地并駢家巍集束
置莫譚不知詞翰由祕貴妙曲深義理突來層抒鮮罄迺
以淺近構藻開筆俗泄童孩易知婦女可曉末師窪識弊
端奚洗厥憾一也 國朝儒風卓犖經義麗天諸師授義
步擬漢家士之談經者咸尚藻儷故說解樸實文亦茂美

然而道有分盡功難合齊伯川從經卽廢初年之業容甫
述學轉緩搜文之思豈才識之不及哉特以經旨紛囋皓
首莫殫疑誤易沿一藝遺罅又或迫於人事耗於神力是
則諸儒之舍彼取此不能以旁騖亂思撥厥所由豢從蓋
闕厥憾二也作者日鮮善體斯難或失之繇或失之實繇
則麗藻過綺累而不飛實則骨幹太清陋而不韻文質彬
彬然後君子度諸此義合者維艱厥憾三也若夫深洞經
義宏發詞令卓三憾而俱泯兼諸長以獨擅惟於夫子見
之已夫子生稟奇姿敏捷文藻中年說經彌尊伏勝暇日
論禮心崇高密縕澤旣閑儀彩聿富錯鎔已實呖鐘肆鳴

夫頌讚之作歸諸美揚夫子以闡發之旨光麗鴻之典伏
戲畫卦易數因之胎垂史皇剏彰詁訓於焉字乳而河洛
寫圖妄肆疑經之鼓帝史異說疇定字聖之名雪疑詔來
二篇尚矣又况崔寔論政洞窺事宜蔚宗修史卓茂嘉詞
懲孤秦弱宋之非闡武侯謝傅之嫻本諸華藻以表史蹟
洵奧特之鬼觀蔚宏之美構畧條片端未概全質峻槃之
篇固匯源於泰始雜品之作又恢恢於元嘉斯則卷薤適
雅不得擅芳於前石筍瑰奇允宜連璫齊耀矣且夫桐柏
盤根於龍門之岡非葉茂之足峙蛟虬讚光於神渤之窟
詎斑鱗以爲珍夫子方精力丹鉛游心箋釋剖析經疑纂

述宏冊區區文篇固視末致惟是上乘已失妙馭罕能久
經長昏乍覩鴻曜習處蛩穴忽聞鸞音法式所承端資千
禩豈僅都人爭傳寫左思之賦本學士推頌識庾信之妙
文遇合之事爲足欣榮也哉贊元學識謏陋語言淺膚管
張筵持詎合涓埃燭捫槃叩莫表什一然念從遊五載諄
誨日親雖師承相接欲贊難名而披誦篇章嗜愛莫已子
屏表笥河之學詎屬諛稱輿軒序東原之書敬述宗旨云
爾光緒旃蒙協洽壯月受業賀贊元謹序

序

蓋自結繩旣移乃列文象書契已作爰脩辭藻固質文之
代興惟華實其相贍是以耆德開姚典謨攸灼姬宗腫子
訓誥克炤累葉而降斯道鼎新簪筆實繁其徒燔書莫泐
其緒蓋古朴之氣漸替而焜耀之旨彌繁矣炎德繼運羣
言逾昌琢摩京都則班張演其派升濟堂室則賈馬揚其
鑣斯實步軌三五權輿四六而下帷董子不無麗縉之文
耽古桓生遂彰論纂之富夫源遠者支衍而積潦易涸芟
壯者穎茂而折枝恆凋故理不勝辭用寡是誚采而乏骨
雉竄非誣然則耀靈蛇於掌握發雕龍於胸臆杼軸清英

有如成誦軒翥藝苑競推大筆非夫義理精詳訓詁明覈紀綱禮樂貫鍊墳典憑經以騁思媿潘勗之淵通引書以助才類劉向之該博其餘靡足觀矣孰能臻斯懿乎

國朝右文越古雅化作人大可豔發於蕭山竹垞鷹揚於秀水巽軒儀鄭煥乎有文雅存卷施卓爾大雅類皆探真源於經藝闢康莊於詞林萃案斷之專家繼往籍之絕學茲爲羣矣難乎繼焉鹿門夫子南邦詞祖東山聖徒閉廬覃思穿牀嗜古賈疏鄭注宏啟其藩籬墨守膏肓別構其戶牖翼孝經小同之古義補爾雅景純之遺說精言在抱麗體尤工作師伏堂駢文都爲一集飛館玉池之巨製桂

林湘水之華篇纂瑯嬛之綈縑絺句從心綜崑崙之縹囊
才鋒奔命遂使聯章而圭璧合振翰而風雲蜚語厥宮商
擊石之歌鳳舞方之錦綺真珠之服龍盤豈直工文張鷟
選學士之錢隸事王摛抽何公之簞而已哉錦夙邀甄鑄
曾登大匠之門謬副賞音用愧桐亭之竹譬觀岱獄徒印
其崇穹若涉滄溟罔尋其垠塢託茲沆瀣罄厥管蠡剗劖
方新揄揚未沫漱芳傾瀝如觀太學之藏積玉碎金難作
枕中之祕庶幾正聲不寢無亂州鳩之聰鵠的是縣弗誤
養由之矢云爾受業徐運錦敬譔

師伏堂駢文卷一

倉帝史皇氏頌

慮戲畫卦頌

舜陵銘

秦始皇論

諸葛亮論

晉武帝論

謝安論

唐太宗論

唐四夷傳論

宋論

寇準論

王安石論

春秋列國名臣序贊

漢雲臺中興諸將序贊

與李荔村書

重修屈賈合祠啟

告伍公廟文

游空靈峽記

師伏堂駢文

善化皮錫瑞

倉帝史皇氏頌

厥初生民未有文字系絕氏號之綴人傳混沌之術倨倨
眊眊自以爲馬牛榛榛莽莽未遠乎鹿豕丹壺莫紀元中
無記金符弗炳玉檢斯闕壹聞罕漫日月無以耀其光元
混寂寥乾坤不能挾其奧不有寶炬曷開重幽苟非文明
將遂長夜又自巢燧以後純氣漸離剝木之爭難憑默識
結繩之治莫化澆頑乃牖天衷篤生倉帝惟帝生有睿德
產而能書若俎豆之陳出於嬉戲荏苒之藝見夫岐疑神

奇靈異莫得而究矣若乃九頭前闔叶乎言教四目獨炯
炤其靈光表並明之奇呈侈哆之象南巡上洛臨元扈以
觀天獨步陽虛感青雲之扶日於是上天降之乃命靈龜
負書而出丹甲有煒青文斯煥帝甄茲靈貺拜受河圖鑿
鑄明聰儀度晷緯屈曲懸象仰覽奎垣之精順環無端俯
名物理之異鳥迹間撫始兆古文蝌蚪旁通非同繆篆爰
乃權輿六體作憲百王形聲相參假借居後依類象物視
狗知畫犬之形隨體辨名伏禾制禿人之義是知字者孳
也相生而體勢繁書者如也取譬而竹帛著玉山冊府循
而通明寶爰經函紹以闡繹遂使形兆整墜號紀於云亭

法式恆常度昭於書契銀繩瓊檢懸燭龍以照侗儻玉律
金科耀陽鳥以驚瞶寐天地之精神變矣民人之耳目新
矣聖矣哉文學之始其肇於通姓之初乎鴻蒙將闢鬼神
乃牖其靈蟲鳥炫奇聖哲亦師其智始則倉書垂憲而神
龜呈玉版之祥繼則羲畫開天而龍馬授瑤圖之兆終乃
孔經定制而麟獸啟寶書之文傳之億齡懿此三聖作者
惟帝獨開其先是故登封七十二君首推制作禪通一十
八姓丕冠侯岡或謂身爲史官乃非帝號不知無懷封岱
早勒金泥炎帝御民已昭玉契此皆紀先疏伋代遠軒皇
且黃帝時臣有容成氏乃同於古帝史有孔甲名亦協夫

夏王安知帝軒之朝不更有倉氏之史乎或又謂摘奸者
法法倣而奸生化俗者文文繁而俗薄奇它密網誰還樸
鄙以焚符章句凝脂且憑詩禮而發冢聖死盜止審爲厲
階鬼哭龍藏應傷竅鑿則是官禮誤世元公蒙新莽之辜
讀書喪邦立聖受湘東之責以鳴憤激奚解刻深今者尉
律諷字皆帝之遺文學僮操觚盡帝之餘澤稽史斯篆比
於孫子邈隸章草列爲曾元雖踵事增華不盡龍顏之製
而尋枝顧本敢忘鳳翔之祠敝八會於金書含十華於玉
券博攷乎李斯張敞杜林楊雄許慎所著咸述聖之功臣
旁徵乎崔瑗蔡邕曹植索靖顧野王之言信稽古之帝者

別裁僞體證末學鄉壁虛造之非暉麗同文斥佞盧石行
夷音之陋外臣不敏敢稽首拜手而獻頌曰

聖倉穆穆上繼庸成鴻荒肇開龍德挺生剖璞而耀燭幽
以明瓠窵斯鑿草昧乃更綠字觀河丹書獻洛負比蒼龍
銜同赤雀人厭屯蒙天垂制作道合神符靈通秘籙雨粟
方應削簡遂滋江河聲合日月形規响嶠摺逸石鼓獵奇
秦廷灰燼魯壁金絲百官以治萬民以察煥章開矇易契
鋤猾象魏昭文鴻生握札謬說軒臣虛談史頡體變千古
義銘六書蠱皿測蟲丁枕參魚刻符摹印勒署刊及孰簡
而竊孰篋而肱穀穀斯冰孕育周孔華路首庸名尸非俑

鳳麟增輝蟬蠹遺種述古風微尋源義重德翊三陽治逾
百年驂駕栗陸跨蹏麗連陽武都古倉垣壤偏造成師曠
吹臺列仙利鄉戕戕遺蛻斯委九尺崇封千秋刺紙法施
黎首靈相椎指日諱丙寅拜同庚子說文撫許訓纂編楊
爰厯博學滂喜凡將肅肅孔里沈沈未央彝鼎隻義俎豆
三蒼惟皇斯煌惟作乃聖大文弼彪萬嗣型鏡因提仰承
柏皇繼正逸象肇開轡龍爲盛上天作令皇辟迭王碑銘
漢建石刻周藏寂寥世繫彷彿蹏远天生大聖淵哉史皇

虛戲畫卦頌

天墜未形馮翼洞燭氣始形始質始兆乎渾淪太初太始
太素先以太易九變復貫剖判元黃萬彙品生權輿太極
是知天地統於陰陽陰陽妙於變化乃自九頭前闔五龍
繼治循蜚合維此祕未覩吉夷几邁斯文尙暖雖巢燧漸
宏制作懷葛早耀升中而皇策弗乘神著未得十言之教
何其濶歟於是蒼牙通靈毓聖皇雄之氏華胥感虹降神
仇夷之地木德應運春皇挺生牛首龍身誕此奇表珠衡
日角穆乎睟容龍紀命官鳥明佐治含養蠢化枕方寢繩
儷皮脩儀則蜎蠕知別田獵率衆則蹄迹斂芒立禮教而

造干戈變茹腥而去巢穴固已八區合照百王讓先矣而其通神明類萬物者則尤在畫卦焉於時開闢以來世歷九紀禪通之代姓易十七菁華欲啟造物假於聖神苞符肇開孟河呈其龍馬鱗文旣獻象數斯炳皇乃震動役其神思近協身度遠挾物蘊俯仰法象刻畫羽毛乃作八卦因而重文是爲開天之畫以極探賾之妙假智靈草覽兆介蟲七十二鑽之龜元王通其夢十有八變之筮巫咸善其占飛伏變易匪幽弗窮消長吉凶靡奧不洎俾天地無淪於虛器陰陽不墮於渺微非天下之至神孰能與於此乎丕休哉獲麟制作無貸弗挾獨絕彼韋編而鐵搥三折

祖龍窮殃有壁莫藏獨歛彼炬火而筮書彌彰江東野臂
施於京費胡以戰國之昧昧而薪傳斯貴先歐旄頭召夫
梁丘胡以漢廷之羣咻而筮應是求洪荒夢夢賴茲神聰
靈蓍叢叢秀風陵之中末世瞠瞠師其餘智稽疑命筮受
先聖之賜固宜索隱補史之筆獨冠蒼精溫公稽古之篇
肇端太昊也遂作頌曰

太極之元渾敦齋滌兩儀是生四象出焉睢盱伺蒙彌億
萬年雖斟元陳樞而圖書未宣履迹生犧同符姜嫄日月
重輪乃畫坤乾貞卜者龜負圖惟馬身辨鱗采幣耀汗赭
蘿圖援瑞而蒼昊錫嘏寶文呈文而訾黃來下生蓍倚數

觀象應樞兩地合契參天剖符謂帝不重卦吁彼奢儒亦有博士云燧皇之圖未耨交易剡木弦弧舟楫杵臼宮室契書萬象駢羅取之裕如何取彼離卦獨用夫畋漁豈留此祕藏以永乎古初連山歸藏玉門演文八索旣出十翼斯繁子雲沈思默而太玄元包潛虛擬經益紛徒勞架屋而終闕皇墳莫洞乎帝之藩卦氣爻辰世應納甲見仁見智元本殫洽陰陽五行謬託龜筮鬻技衒術取義尤狹實盜乎帝之法虞夢吞爻爲漢續傳王侈清言爲宋導原造爲龍圖乃名先天數學皇極道家陳搏昌窮乎帝之淵圜則九重孰盡其象大瀛無涯孰極其廣浹遐洞冥察來彰

往人矜淵微每墮忽慌十日甲歷誰卦析之九州別宮惟
卦飭之朝帝靈門千秋式之幽贊明伊誰測之

舜陵銘

粵自二儀剖分五德代嬪巢燧玄默肇開皇風鴻黃世及
以一民紀然而行踰視瞑未離倨眄之習佐昊相頊弗顯
崛興之奇若乃兆飛躍於田龍煥文明於巢鳳終禪讓之
盛美集煌諦之大成者其惟有虞氏乎在昔縱華感樞翼
土毓懷珠之聖攝提應象姚墟呈握石之祥虹瑞旣彰龍
顏斯挺黃精式炳丕揚星日之光玄德斯升大奠山川之
理無爲崇夫至治不與仰其巍巍盡美又善無得稱矣若
夫搜太史氏之軼遺擬庾仲初之像贊揆張瑞應撫祕籙
於緯文標準卷婁屏卮言於傲吏使荃宰有寄神謨斯在

則亦有可徵者焉夫鳴鷄朝日不皆累聖相承掇蜂履霜
未見感天有驗乃于田一號井廩再厄大杖弗受兩笠空
扞雖龍工鵲裳資謀二女而牧牛表虎早厯諸難聞鳩感
思旣極窮人之瘁占鳳舐目乃致頑父之夢引隱彌重底
豫乃孚爰舉服澤之陽遂殫天下之養而齋夔唯謹猶載
旌朝庠象就封若忘謨蓋此則帝之孝也古之席蘿圖拱
松棟莫不亭毒鶉居之衆挺桐蜎動之民而帝則當龍潛
早有羶行均傳虛之貴賤化坻畔之侵爭厯山祠田祝四
海之俱有雷澤鑿瀆務天下與同利是以士就士悅邁亶
父之遷岐成邑成都踰孰哉之啟國人慕如螳化馳若神

豈待薰風撫絃始解民愠元日格祖乃服蠻夷此又帝之
仁也水火不損其真風雷弗迷其性王者不死天命有歸
於是五老告期謂黃姚爲知我長人感夢表赤龍之負圖
綠色臨壇青泥授帝示紀錄興亡之數顯殷周秦漢之符
至乃山車垂綬乘黃服阜蕢焚生陞景星耀房休氣四塞
始彰賜璽之來慶雲蓂蓂終兆褰裳之去此又帝之神也
桑陰不違柴望斯薦名授大任實投鉅艱斯時也人戴魚
頭國交鳥迹槽巢已革而壤少平居蘆灰久填而水仍泛
溢帝乃升聞弗震厯試罔驚百蟲將軍掌火烈澤黃熊嗣
子刊木隨山災澹滔天民欣宅土璿璣齊政車服庸臣四

目四聰廣其明聽八元八愷贊斯平成永五十載星陳之
輝宏十二州風動之治琯呈白玉蓋地來西母之圖壇起
赤光巡洛受南山之錄此又帝之聖也帝堯倦勤醜類方
熾驩頭比黨惡物劇於龍蛇舉尾爲旌毒民烈乎猛獸五
刑旣制四罪咸孚備懲共驩苗繇之辜遂變蠻狄戎夷之
俗鳥喙作士襄茲明刑羊角觸邪助此弼教始猶嚴夫猾
夏繼乃化以無誅畫衣之懲憚於肆市舞羽之化威過移
師予正罔干不仁者遠此又帝之武也梟俎兩敦祭報大
旂七廟之制肇修五龍之駕肅舉奏鷁鷁之樂朱鳳方儀
比翼哉之謠玄鶴斯舞日月作會麗於垂衣星辰有行華

此復旦總期聽政早立明堂之基米廩名庠無忘畎畝之
舊變閭閻於五紀啟郁郁於三代用使聞韶者忘肉味數
典者先轡車此又帝之文也然猶學蒲衣師單卷務成子
跗藉其一言雄陶方回引爲七友因塗髹而納諫嚴乃見
其捐金立謗木以求箴旌更揚夫告善燕禮養老開攝几
之儀魔衣無飾示茨牆之儉谷璧是抵鎗盆亡臙草茹勿
忘叢脞攸誠此又帝之恭也且夫揖遜之世蜚遁爲高憤
口羞汙乃致絕友鼠腹易滿不能代庖帝則與民同憂念
世深墨辭山中之鹿豕席貳室之龍埳衫衣固有匪高箕
穎之瓢黃屋非心豈慕昭華之玉南河避榮中國踐位總

師格禹帥官遷虞百姓與能則還官不辭八風循通則敝
 屣如脫天下非一人之天下授受取與無容心焉此又帝
 之大也懿矣哉執中一語開洛閩兩廡之傳明良再歌想
 喜起千秋之盛冠四代之器揭豆泰尊歌八伯之風朱于
 芾落後世有作弗及虞帝之隆放勳獨憂先資敷治之舉
 授鉞彭蠡有立官之祇承張樂洞庭疑黃軒之再出固宜
 匹夫而有天下勗振古未有之奇其咨而能俾乂拯萬姓
 橫流之困朝覲訟獄弗歸乎丹朱親尊安敬獨推於立聖
 乃使南山歌者恨不逢時東鄙野人侈談盛德聲教訖于
 四海錫立圭者善必歸君聖德必祀百世賜楛矢者齊猶

繼守豈同懷葛卷領文治未遑禹湯驟馳王猷已降者哉
精華已竭黃星靡鋒龍髯墮於鼎湖鳳吹息夫大麓百歲
厭代乘白雲而至帝鄉九疑連綿隕素霜而寒輦路瓦棺
示樸追上古之不封葛緘崇儉比會稽之窆石或疑鳴條
乃卒紀市有徵豈從蒲坂之都遙葬荆蠻之域不知雲陽
古帝蓋處長沙祝誦遺墟猶傳衡嶽金天明聖遙封露水
之鄉炎帝神靈遠窆茶陵之地况以帝之普天共戴交趾
南通入十龍之門旁徵僊錄走逐鹿之馬奇撫真源神異
之蹤詎必故都之戀乎迄今蒼梧聖蹟象亦能耕赤水神
鄉雀猶銜土嵯峨韶石彷彿九奏之聲浩渺零陵未從三

如之葬望鰲螭之並至湘浦波連思傲象之常來鼻亭壤
接野森斑竹疑萌朱草之榮阜積珠塵恍致玉環之貢遂
使太陽溪畔漢唐鏤其琬碑營道邑中春秋潔其瑤瑱千
年虎豹畏軒皇弓劍之神萬里風雲接唐帝穀林之壠銘
曰

循蜚易代紀鳳書年榛狂漸闢聲明未宣龍門遲鑿鴻水
蔓延殷憂啟聖異位推賢窮蟬世微有鰥師錫意感瑤樞
精呈玉歷姚水挺生濟巖潛匿祕隱珍符戢藏鱗翼光光
重華明瞳朗秀下洞玄景上燭天文方庭衡日側陋興雲
晚履帝位早稱都君帝惟參牟父乃瞽目號傷耕田泣悔

羅穀篤謹匪懈陶漁奚辱積誠感神盡孝敦睦天授寶籙
堯錫絺衣臣庶使治盲瑩來歸赤文龜獻綠字龍輝晷緯
叶應天人弗違指麾夔龍揖讓熊虎凶族翦四帝臣登五
掘地蛇驅來庭獸舞誰其嗣之惟立官禹五等輯瑞三光
察衡易俗以禮折民惟刑庭實玉帛異章巾纓府事允治
山川咸平欽翼皇象彰施雌彝郊禘黻冕聽朝深衣獨遊
巖廊萬物熙熙行衢龍馬司晨鳳鷄珠蝦貫胷祥鳥三趾
立都獻玉息慎稟矢民乃粒食帝猶錙筮諫鼓其鏗漆器
非侈養軒方舞笙筦俄遷蟠龍迅藏蛟魚踊淵萬邦高謝
一笑擁璿澹此尊位薦於皇天九原颺功大唐紹德玉燭

調年非煙異色弗戀弗貪惟淵惟默道邁逃堯光高遜國
蛻僑門食陰陽胎精悲纏紫極戀結滄瀛穀木襲殯金絲
息聲同哀地圻空望河清龍輶遷塗虹綬委旃日寢衫衣
雲低縞蓋野揚青砂水燦文貝神乃上僊魂非樂沛孤墳
何是九山相疑陰冥隧道杳靄崇祠睿謨永閔靈蹟空垂
大荒古經齋曰漢碑宵明靈光湘妃古淚有庠近封叔均
同殽神所憑依市不易肆要服非遙橋山豈僞蒲津都遠
巡狩臺荒鳳簫未歇龍藻斯藏邇際黃陵下瞰清湘千秋
萬歲謳歌弗忘

秦始皇論

天下之事有勢有時制事之方有德有刃藉勢之盛恃力可以囊括八荒乘時而興薄德亦能包四海卞莊乘兩虎之弊乃刺之以得名由基穿百步之楊必教之以善後何則虎鬥已疲本無藉夫大力穿楊屢中不可無以養威也始皇藉四世之烈烈乘六國之蚩蚩舉趙魏若撥𪔐取荆齊如振槁九州一統歸白阜之圖萬里銷烽奉黃靈之籍威燁神鬼黃軒若遜其武功勢迅風霆湯武難媲其鴻烈所以奮長策朝同列者徒以國擅天府敵罕堅城道積陂而將平世久分而欲合鵜首錫土利觜擅場始皇悍然矜其

威德初不知爲時勢之異也於是狹小上世之制度迅埽前聖之規模厭老生之常談甘諂子之瞽說去泰著皇兼三五之名革謚稱代爲萬世之計厥見旣謬侈心益生以法律爲詩書化簡策爲煨燼偶語棄市刑甚甯越之鞭議瓜騶山悲生死士之壟立一王之法革厯代之舊垂鴻滄海之曲勒崇琅瑯之臺青松金椎馳道交夫四極黍燈銀鴈錮陵及於三泉五丈之旗建於阿房萬里之戍勞於胡越卒之鮑臭之車乍及狐鳴之兆遽呈祖龍之壁方獻斬蛇之劍已奮峭函自若海水羣飛豈非時異勢殊棄德任力之過歟且夫三代以還五德斯邈前後二漢失在雜霸

唐宋兩代豈盡純王然而白旗甫懸必懲倣轍黃屋始建
先聘明賢王政未盡行不敢棄若芻狗古制未全復亦稍
脩夫餽羊知戈矛非所以安萌必息馬而論道知刀鋸非
所以孚衆必漏魚以解苛蓋仁義難言也久假則天下可
王殺人未免也不嗜則四海能一此興廢之炯戒非成敗
以論人也彼秦人者沿商於之刻薄習上蔡之從諛廓矣
黃圖恣其吮牙懞懞黔首視若封豕以威力爲足恃以刑
名爲獨賢以白屋爲無才以金城爲不敗鄙先王爲無足
法也故焚燒以除之輕儒者爲靡所用也故阬陷以懼之
無一而亡蘭陵料之於前仁義不施長沙過之於後專用

己私安有享祜者哉厥後失鹿共逐鑿齒磨牙項氏所爲
乃有甚於秦者漢祖則儒冠之溺雖失於先馬上之治旋
悔於後稷嗣定禮有朝十月之儀陸生奏書羣呼萬歲之
號故雖遜古猶未劇秦號令三嬪興亡忽焉不可不察也

諸葛亮論

夫媯皇之石五色可以補天魯陽之戈三合乃能麾日然
非忠貫金石力旋乾坤豈能支一木於將危援三靈於已
墜有窮盜夏伯靡振其弛綱流彘閔周共和紹其絕緒亞
斯之代厥風邈焉雖淖齒亡齊田單迎法章於莒邑負芻
見虜項燕立昌平於淮南而或敗死無成或倖於一勝秉
誼雖固抱器未優若乃仰承伊周俛視蕭管足以立人臣
之極迴天地之心者其惟漢諸葛武侯乎夫玉馬駿奔不
嫌周旋二姓良禽擇木可以相君九州然而采薇恥周絕
脰復國百世猶感頑懦匹夫亦繫興亡蓋盤桓居貞者道

也纓冠救世者才也道必兼才而才不勝道自蒙孫委馭
海水羣飛當塗假黃龍之祥黽穴起紫髯之傑爭攀鱗翼
並奮虬虎或攸揚聲於許下瑜肅振彩於江東揆以恆情
未足苛論準之大義終有閒然武侯戢景草廬抗吟梁父
躬耕匪辱聞達不求有鳳觀虎視之能而澹泊以明志有
豹隱龍潛之致而韜晦以俟時不銜玉於仲謀不投珠於
孟德不標奇以動坐談客不捭闔以干東諸侯其心以謂
世爲漢臣不能事異姓也遼東皂帽美楊彪之皮冠彭澤
葛巾榮王謚之墨綬維時左將軍以帝室之胄劉宗之英
魚得水而乃諧龍卧岡而未起元直介紹水鏡推薦猶必

三顧枉屈而後一許馳驅焉論其高致何愧首陽慶彼遭逢已光莘野斯豈三代以下所能再見者乎說者謂公經國則偉應變匪長王業卒限偏安祁山空勞六出豈知知不可而老歷聘者宣聖之仁也爲其難以愧二心者豫子之義也其時昭烈尚無尺土曹氏已據八州公抗言隆中指畫荆益其勢固不敵矣然猶用寡擊衆轉弱爲強出師震關輔之心討賊抗君臣之義至於荊州之失秭歸之奔子午之拒街亭之敗則或不任其咎或知人實難天之廢興非人之利鈍也且夫志決身殲者不以功名爲重鞠躬盡瘁者難以成敗論人公感激危難之中崎嶇成旅之下

卽令終無成效卒隕大業猶足光明日月義激風霜乃自
起南陽入西蜀渡瀘水屯涓濱開誠布公安內攘外晟生
原爲社稷綱至方成朝廷後主闇君也而事之若父宣王
雄傑也而畏之如虎向使雜耕之兵仍進五丈之星不沈
無何曹叡天年懿爽互競乘其內鬪以清中原安見不能
反故鼎於元英謁寢園於伊雒哉蓋公不遇昭烈則將遁
迹終身昭烈不得公亦且竄身無所而公出山之始僅鄧
仲華拜袞之年秉國之初祇荀中郎建節之歲卒使鼎足
既定髀肉無嗟正議作書大統攸屬赤龍未沒延祚四十
餘年維鳳夙終獨建三分大策雖微物銜石莫塞橫流而

一夫移山竟挽天步風烈所被慕效實繁每當統微祚絕之時賢者輒欲舉義旗植宗子而力難勝天敗或塗地豈惟奇才莫逮抑亦遇主實艱遂使羽扇綸巾永懷名士之度黃鵬碧草空慨丞相之祠若夫神筆一揮牛馬斯運陣石不轉猿鳥猶畏後世殫厥技巧在公特爲緒餘豈其神乎非可詳也

晉武帝論

將欲鞏萬年之金甌貽千禩之寶鏡則必基固磐石戒懍
衣衽良以江河不塞兆於涓涓燎原之火始自燄燄古之
帝王申畫封守隔閼華戎不揖盜以窺天不教獠以升木
毳毳冠帶各安中外之便城郭廬帳毋溷耕獵之徒來朝
者坐之門外不示人以利器執禁者達以符節不使近夫
華風是以世變雖亟族分不亂驪山構禍莫據宗周白登
被圍仍出塞徼夫豺狼之性豈有厭哉然而山居不慕魚
鼈澤處不嗜鹿豕斯耳目之異也越人見布駭毳蜀犬見
雪疑日斯習俗之殊也以彼生自異域不睹中原旃裘是

習何知錦繡湮酪爲美寧假珍羞內地弗安漢物非嗜上
無侵據之意下有速歸之情故秋高馬肥亦但苦其掠奪
中周虎落不聞據我邊城也司馬崛興大象始構斯時庸
蜀勾吳雖歸一統而西戎北狄偪處諸華蓋自光武處胡
西河伏波徙羌三輔廚泉受命雖有向風之誠劉猛奔叛
已兆履霜之漸慕容拓拔鮮卑族殊枋頭赤亭氏羌種別
時則有江統徙戎之論郭欽先事之謀良以泮林雖集鴉
音難革風塵有警狼心必生五部其假質子之毛羽將豐
東門倚嘯胡雛之頭角已露辛有之歎此其戎乎武帝遠
慮不及侈心遽呈狃燕雀之嬉堂昧蠶蠶之有毒錢神著

論政以賄成金穴擅權柄歸姻亞南風烈烈魯國之晨牝
爲妖草木萌芽曠林之尋戈日亟伏尸彭祖嗾樊相從奴
才成都放虎自衛於是蒼鷺識亂銅駝識亡牛車無以避
滄海之流塵尾莫能揮屠各之衆遂使薄呼韓而襲尊號
漢帝受非祖之祀豔中華而棄故穴堯都設單于之庭鎬
洛皇州皆爲左袵吳越夷壤畢萃衣冠地脈爲之轉移天
心幾同醉夢慢藏致寇釀亂獨深是亦乾坤之大變今古
之傷心者矣嗚乎戎狄之興非一朝一夕之故也禍胎於
建武而釁發於永嘉分爲五胡散爲十六蝸角植國蠻觸
弄兵龍穴有神獫狁爭處而晉人近忘新亭涕淚遠師洛

下風流元子未復神州寄奴莫甄舊物卒致併歸北魏勢
敵南朝步陸賀婁稱代北之上姓蠻靴胡服入朝會之盛
儀釋老異端皆興於虜俗朝野典禮半雜夫夷風黃河濁
而阿膠不能澄其流大浸沈而蘆灰不能止其溺舉夫黃
軒之所手畫勳華之所心勞商周維持之力秦漢防遏之
苦一旦藩籬盡撤文物蕩然誰生厲階至今爲梗則豈非
雉裘旣焚之後羊車宴遊之時曲突可虞而垂堂莫戒金
城失固而鐵室莫防哉遂使羯狗盜國魚羊食人三月抱
胡虜之腰千歲生髑髏之齒雖或慷慨擊楫倉皇枕戈大
事去矣弗可挽也已

謝安論

在昔談笑卻秦偃息藩魏甘寢秉羽而郢人投兵息鼓卧
旗而魏師自退者皆當金鉉照野玉弩驚天鎮定以固人
心堅持以摧敵勢是故撼之不動者如山之軍也震之不
搖者磐石之國也然而大言無實常清竟敗唐軍如意麾
軍昭遠卒亡孟蜀長平括喪街亭謾失安可坐昧長算虛
夸雅量哉夫晉自蒼鵠出地鐵騎交飛石羯亂華銅駝飲
泣永嘉南渡江左偏安元子上陵荆揚幅裂苻堅負百萬
之衆逞數勝之威投鞭斷流空國而興大舉推枰決策置
第以待降王羽檄風馳鳴鏑日耀王邑向宛獸作前行佛

狸臨江燕巢林木蓋自以爲有甲車四千乘無道亦足橫
行治水軍八十萬會獵無能與敵矣太傅襟宇泰定神色
怡然處變若常元公赤舄之素對敵如奕文偉圍碁之遊
卒之大功出自儒生小兒能破敵虜黃鉞不假白羽自麾
棋枰未收捷書已報拔山無力幾爭項羽之頭濁水不流
似中楚共之目長蛇翦而器械委如山積奔鯨曝而草木
皆助天威蓋過阿龍之超參微管之力矣雖然公之靜鎮
世共仰之公之長算人或昧之夫山有猛獸藜藿不采國
有虎臣窺覲寢謀黔夫守齊燕人祭北門之鬼吳起用魏
秦國畏西河之兵公自錄尚書卽開軍府不避內舉亟思

外攘幼度羯末之才階前玉樹牢之龍驤之將闔外金城
國有人焉豈可動耶且夫恃安忘戰處堂巢幕之危也重
外輕內太阿倒持之勢也其時人尚清言士少雄畧周伯
仁中州名勝徒隕楚囚之涕王茂宏江左夷吾不出渭濱
之師萬石如意空揮淵源高閣可束加以京師勢弱荆楚
兵強桓文之勳莫成敦溫之逆日構公督徐豫乃求將才
北府有兵南風甚勁京邑震恐而公安之桓沖兵來而公
卻之外以防寇敵憑陵內以制上流跋扈是故抗威徐沛
寄奴猶資以成功披析荆江靈寶不得遽興亂也蓋鎮物
者德也御物者量也公少有高世之志晚懷滄海之心霜

露弗患其渝雷霆不聞其震手版不倒異乎流汗之怯展
齒可折詎顧矯情之譏其視草付之來猶新亭陳衛而從
容可卻也淮肥之警猶壁後置人而笑語可麾也以公德
量之優乘敵敗亡之會風鶴助順魚羊食人何難埽洛水
之園陵復鼎門之鍾簾而乃孱主不武懿親非賢奇功未
成震主斯避南陽之龍卧不復已落大星乘輿之雞夢爲
妖遽嗟太歲蓋自公沒而晉隨之隕矣能不下西州之淚
仰東山之風哉夫以典午清談常爲後世口實當時名士
猶有斯人今風流已遙掩鼻莫效際此四郊多壘大敵窺
邊懷訐謨之遠猶念蒼生之安屬倘亦有聞而興起者乎

唐太宗論

羲軒邈矣古今殊事虞夏忽焉我安適歸睹日下之河江
滔滔皆是嗟慘黷之宇宙漫漫安竭爰自宮隣金虎之後
極夫鑿齒爭鹿之禍重以翟泉蒼鵝之出逮夫晉水飛龍
之前素靈夜哭黃神嘯吟海水羣飛神州幅裂棋分黑白
一枰鼠穴之爭血洒元黃萬衆蝸角之鬪雖時亦有上膺
帝錄下奠民生然秦漢二皇虛鏤金版晉隋兩主空煥銀
繩未有恢萬禩之鴻圖揚丕天之大律殊尤絕迹可考於
今者也彼蒼厭亂太宗挺生三精重暉九縣一統鳳皇裂
序鍊五石以振天巨鼇傾山營八極而奠地以德威撫殊

俗四裔仰之如天以仁義致太平倭臣愧而入地神武鏖
古文德燠今動青丘而耀朱垠震白山而輝元闕然而帝
之規恢大量猶歛然其未足睿慮神智睹近效而弗安也
嘗乙夜觀書得周官維王建國之說而慨然曰不封建井
田不可以治天下大哉王言可謂千載一時者矣無如王
者雖作名世未興房魏非矢謨之臣顏李持一孔之論識
窘目睫不覩紫宙之宏量隘蹄涔莫窺滄瀛之廣將順其
美道愧夷吾吾君不能戒昧鄒嶧徒使府兵庸調略存三
代之遺畫井分封永絕隆古之治失曠代之良會貽來葉
之永恨不亦惜乎且夫赤壚黑壤畫野維艱黃土白茅胙

隴朱旗北斗遂警甘泉之烽汗馬西戎幾成驪山之禍戰
功黷而閭帥畔邊備虛而我心生釁本起於開邊終且亡
其故地當其盛也綠瞳赤髮胥登王會之圖丹闕青邱盡
奉天朝之朔何其壯也及其衰也花門蕭瑟涇漢臣之血
衣使節巡行下遺民之涕淚又何憊耶盛衰一時成敗易
轍鞭長末由及腹悔後乃將噬臍豈非有國家者所當永
鑒者乎今夫赤縣廣矣誰窮大瀛之邊黃圖重矣當思內
治之急若徒負師武以逞威報忿怒以除患去一敵復生
一敵滅一戎又出一戎國破者種尚存人俘者地故在頡
利旣獻回紇復強退渾方平吐蕃益熾亦何嘗能並臣瓚

毳全犂幕庭徒使年年烽火怨結胡天夜夜金微心隨明
月和親入貢空費犒賜之財奏凱稱觴何與安危之策其
爲失計無待明言且華夷異類也邊地猶禁奸闖戎狄野
心也來朝坐之門外唐乃誨之以慢藏假之以利器使其
目翫虛實心懷覬覦蕃將列於羽林侍子育於太學侈衣
冠於萬國解辮歸朝夸胡越爲一家拜官尚主雖社爾何
力飛鵝亦解懷音而欽陵萬榮養虎終資反噬卒至謀成
奸相變起胡雛鐵券不足收其心金帳未能厭其意甚至
乞援狼子仰救羯兒強藩挾以憑陵內郡因之坐耗蒼天
何酷赤地堪傷始困中國以事外夷繼借外夷以平中國

終乃夷強國弱外盛中乾其前之侈以爲福者後祇以爲禍也唐之用兵防二虜耳豈知備邊苦而後夥涉興防羗甚而後董逃作卒之北庭勢敗結骨窺邊西蕃國亡詔蠻亂蜀河湟歸而大中之政已壞安南擾而徐州之賊先雄九州幅裂獨眼兵來失天險之榆關打中原之草穀唐自亡耳非吐蕃回紇能亡之也而徒生厲階貽患來葉向使唐之人主懷春秋自焚之戒覽杜史知足之言則亦安至是哉古人所爲越雉不受旅獒進規誠慎之也誠畏之也

宋論

夫圓穹垂象必假日星之光大君御物亦資匡弼之力伊
古哲后誕膺天命知孤智之弗克炤也故委柄於肱股知
獨力之莫能勝也故分任夫爪牙丕續是懋則龍章以榮
之敵愾斯奮則虎賁以錫之立珪旣賜立宮以尊黃鉞方
秉黃土乃胙至於豺牙猾夏狼弧耀芒倚彼扞城維此藩
翰是故湯武開剏則空桑礪溪業炳乎丹圖夏周中興則
伯靡仲山光炤乎青簡休戚與共明良同德上無爾虞之
意下鮮自疑之情用能躋世郅隆振俗豐美未有欲成廣
廈先廢棟梁將赴脩途決棄輓輻而能於事有濟者也道

敝俗薄運極數殫馭下者不以至公爲心而惑甚於盜鐘
籌國者不以遠大爲念而忌切於謀鼎於是內防蕭牆外
忽遠人細固扁鐻鉅忘大盜徒鑒獲麟紛爭之釁不念鳴
狐揭竿之亂惟忌石馬討曹之逆未防蒼鶩出地之兆豈
異乎離婁之照坐燭千里而不見目睫哉嬴氏之興事不
師古盡夷五等之爵以啟孤立之禍自漢以下矯枉雖得
前規未宏然而相尉尊立猶專揆奮之柄牧守分建尚總
兵農之制是以赤眉橫恣熊耳仍降黃家僭尊龍尾旋竄
甘泉警烽禍輕於青城渭橋遊騎災澹於墮海無他羣力
勝獨百足不僵故苞桑之堅上不逮夫三代而葦苕之繫

勢究固於兩宋也太祖以環衛之臣膺羣卒之戴乘人寡弱遂握珍符其時天心之厭亂至矣大位之易姓頻矣取玉璽若掇葉乘黃屋如置碁太祖處之惕然而慮夫旣以此始亦必以終也於是密謀帷幄豫翦機牙中書穿爪而以舊臣見疑列校進袍乃因宿將生忌僞託目眊歎語杯酒廢其坐論而上公鵠立矣奪其兵柄而故屬鳥散矣豈况伯父叔舅謙昭負展之立閭內閭外柄專築壇之授哉太宗繼之猜刻尤甚與夷猶在遭樂陵之禍季札當立濫達泉之誅內戕本根外剔枝葉台鼎屢易數十餘人邊任漸輕二三其柄卒致定難內移失朔方之地幽燕親將被

流矢而歸豈非芟刈支體獨任胸腹之咎歟夫天下大器也興亡大運也大器不可以專力任大運不可以私意持故前非必不懲而懲之勿過乎物後非必不愆而愆之惟擇其人苟付託得親賢卽委裘可安治使佑助乏英傑雖傳餐少成功古先聖王非不知閭閻之可虞偏上之爲患也以爲強臣竊柄愈於盜攘神器內遷究異非類是以倚畀旣重推誠勿疑中有握樞之賢外崇分陝之寄宋失其道獨怙己私覆車過懲束溼尤甚幽州可取翰圖空獻靈夏足收瑋纓徒請萊公身爲文吏竟厄萬歲之呼武襄功匪震主莫解盈廷之惑貌類藝祖黑王見疑相列三朝魏

公懼謗蓋其意謂養兵不用足銷奸雄之心魁柄獨專可
無攘奪之慮寧受天驕之侮也而雷乘之象必杜焉寧爲
異域所并也而同室之爭尤防焉乃至習俗錮人賢者不
免廬陵上疏力詆樞府之才安定著書首重權臣之戒維
彼錚錚尚爾昧昧矧乎孱主委馭庸夫竊權習常者玩爲
固然予智者祕爲家法逮夫東京一夢南渡蒼黃然猶李
相白虎之幡頗疑得衆岳侯黃龍之誓深忌成功碧血風
波清涼湖上覩幾者以保全爲幸激發者以忠勇致誅猶
龍未梟早積李郭之釁高鳥弗盡先切韓彭之冤方謂太
阿獨持利器不假卒之畏鬼而鬼乘其隙竟壓秦字之頭

懼虎而虎搗其虛終亡叛將之手其所爲凝脂法細秋茶
網密者亦何嘗能全防問鼎盡弭窺天徒使志士灰心才
臣掣肘且矯騰層城非端冕可上鞭笞六合非坐論可致
粟非不富也士非不衆也法制非不備也議論非不精也
然而北征再敗胡馬南牧西夏一隅飛鴿全覆酋非冒頓
而不解白登之圍地遠劉聰而更甚平陽之酷終於聲懷
白鴈望絕烏號始慮黃袍之加卒受青衣之辱吁可悲矣
故知籌國者防微以爲道而或出於所防圖功者矯弊以
爲明而更苦其甚弊向使捐彼私忌示以坦懷思任賢之
勿貳戒爾輔之無棄猛士旣盡仍念大風之歌舊將皆盡

亟求白袍之士郡將都試爭盛夫旌旗節使專兵各固其
封守雖彼軼犯安能深入而首尾並至勢比於長蛇頭目
爭捍情同於壹體又何至金甌全盛氣懾龍荒半壁偏安
細同牛角哉且龍能翔九霄而不能不階尺木之勢鵬能
擊萬里而不能不憑扶搖之風紅緯大猷旣重柄任符竹
分治亦須權藉雖有命世之傑皆借王靈之尊昔者鍾室
駢誅驂乘刺背亦何嘗不忘彼尾大戒其柄移然而去其
一不忌其餘也懲乎此無猜乎彼也宋乃矯矯虎臣疑及
一命之士怏怏少主忌盈在廷之人無一事可勿防無一
人爲足信聚兵京師天子自將歛財諸道監州分權守吏

寄等旅人封疆蕩若甌脫外無以拒燒荒之寇內不能寒
草澤之心加以文法苛深禁防纖悉假弱周之姑息行孤
秦之猜刻師申韓之一切託官禮之周詳疑其僭上也並
疑其欺誣恐其擅權也復恐其侵盜輔相之勢輕於胥徒
武人之命懸於文吏覆奏稽滯舉動牽持龔黃猶在莫致
鳳皇之鳴韓白雖存難奮熊虎之力以此行政以此用人
亦奚異乎羈騏驥而欲致千里檻猿猱而責其矯捷哉趙
宋以來中原日弱高論抗夫虞夏實效不及漢唐豈世乏
旋乾之才人無濟世之志乎亦雄心困於法弊偉畧挫於
權輕耳薄有勳伐卽懼夷滅之禍身丁壞亂徒懷死殉之

烈威炳不一內乏腹心輔車無依外鮮唇齒以致赤縣雖
刺黃神嘯吟盜弄喋於潢池夷侵交於海上斧柯莫假空
鬱龜山之歌兵食雖饒莫奏龍庭之績詩曰誰生厲階至
今爲梗然則徇一時之甚便禍後世於無窮揆厥由來豈
非宋祖階之厲哉是故跋前疐後機數難以盡防顧此失
彼私計終乖大道水心總論之說慷慨徒陳文山四鎮之
謀旁皇已晚救敗無術亡也忽焉此殷鑒所以警厲王過
秦所爲嗟二世也

寇準論

國家運祚中衰之後則有蠻夷猾夏之憂故赤龍旣微金
虎亂噬石馬將敗蒼鵝上飛從未有寰海鏡清朝廷鼎盛
而匪茹侵逼遽議奔逃者也趙宋方盛契丹寇邊烽火照
乎甘泉羽檄飛於京邑吹脣沸海欲投草付之鞭呼聲動
山將飲佛狸之馬懦士頸縮具臣魄飛蓋幾幾乎北門不
開南風多死矣萊公安坐中書獨決大策斷齊侯之鞅麾
魯陽之戈卒使黃旗紫蓋士卒歡呼鐵騎金鱗强夷氣懾
乘輿至而折衝者萬里和議成而寢燧者百年乃忌者譏
以城下之盟詆以孤注之喻公豈肯以冠軍之天幸爲元

老之壯猶乎夫天下大器也兵戰凶危也雄如隆準威挫
於平城被圍謀若智囊計失於使君自將故勇夫不忘重
閉千金尚戒垂堂王者無戰而有征神器不輕於一擲公
卽斥遷計修戰備蔣沮阪高之徙亦且伐庸謝安作賭
墅之遊自能破賊亦何必挽六龍之轡當萬馬之衝豈遠
昧春秋之中肩近忘高梁之敗績哉嗚乎宋之積弱有自
來矣當時倘輟親征卽須命將宋自黃袍加身之後杯酒
釋兵之餘烹狗旣懲弗思猛士符鳩未歎已絕長城使當
梁麗衝城櫓槍埽闕徒嗟頗牧空聽鼓鼙竊恐封狼居者
不屬書生屯壩上者皆同兒戲兵出不返鼓行而前杜威

降而重貴爲俘敬達死而從珂坐弊其明鑒也無已則金城命將無逾老臣蔡州無功自請督戰乎而其時衆議紛矣人情惑矣堯叟請幸成都欽若贊遷建業吳蜀之士各爲身謀怯懦之心變爲媚嫉使公獨請黃鉞自鑿凶門而諸人心忌成功內挾孱主樗里之沮甘茂豈顧息壤之盟楊釗之惡哥舒必敗潼關之事蓋兵權畏中制大計慮旁撓君臣必當協謀內外不容異議馬昭奉魏主以幸項乃能並拒東吳世宗斥馮道而臨戎故得親敗北漢公惟奉帝以出則威柄不分李平難以追武侯晉臣無從阻元子是皆防之夙矣慮之深矣向非公之心洞戎機力排羣議

則檀公走爲上計秦孽內怯虛絃勢且天子下殿而奔百
官草間求活又何待黃龍兵至白鴈聲來始傷心北狩之
柴車痛哭南朝之塊肉哉所可惜者大勢可爲懦君不武
五日可了之對勉從於前百年無事之謀難爭於後幽燕
不取金帛反輸內防幸兵之臣外昧請和之恥臨軒目送
忘絳侯社稷之功納幣求成少賈傅倒懸之涕卒之和約
定而武備弛重臣去而國勢摧禍發靖康兆胎景德此則
九州鑄鐵一錯難償者矣後如李忠定之守危城于少保
之翼新主皆能六鼃奠地一柱擎天而宗社未安誅逐旋
及尤可異者萊公斥欽若之避卒困欽若之讒少保拒有

貞之遷終弊有貞之手功罪倒置賢奸混淆此詩人所爲
有雉兔之歌從者所以致龍蛇之歎也

王安石論

夫馬影若練必宣聖而始見龍文之鼎匪孟說而難舉是以聖髮白旣傷吳門之望厓夫牘絕乃極秦武之力豈况天下大器革故大猷利不什不變法害不百不易制安可刻畫前哲妄存比附之迹狃怵小數希冀一切之功哉有宋肇興古制蕩盡徇斗筭之小智昧經國之遠猶慶厯纂御衆正盈朝乃值極盛之時早形虛耗之象一韓一范莫捍曩霄南朝北朝空爭獻納神廟嗣統發憤自雄爰進荆舒獨授政柄蓋神宗所以待之者不在仲父武侯之下而安石所以自待者儼居皋夔稷契之倫夫何陳義甚高

責效多謬圖究若密經務則紛仁義外施多欲內困王霸
始進疆國終怙是治絲而益棼之斲木而更小之也且夫
自強者志志因才而乃恢有爲者才才緣志而後顯志小
者無以抗千里才非者不能控八荒是故琴瑟貴乎更張
而猝然更之則絃絕用藥期於瞑眩而昧者用之則病增
鍛鐵者不可反其鉗御車者不宜窮其馬古之人以乾健
之質乘鼎新之機有若神禹治河民聚瓦石殷王遷國人
出矢言尼山謗夫麤裘鄭國譏其蠶尾亦嘗奮其獨斷斥
彼浮言然慮始雖難樂成可與豈若武靈騎射徒變鵠冠
之服商君法獎終致牛車之禍哉宋之積衰乃非貧弱失

在內積嫌疑制過繁重外託忠厚弊見委靡賞加無名刑
廢不用財不外散兵無專屬是以勢席全盛懷壓境之懼
富擁四海切仰屋之憂使能懲其敝轍振其頽緒上罄推
心之誠下免掣肘之患雄邊鉅鎮委以重兵郊賞冗官除
其濫費變牛毛之法網漏吞舟任虎牙之將權寄授鉞守
府虛器戒周末之文弱撻鬼哀荆仿商家之駿厲則積弊
可漸革而富强可立致也安石得君銳意更變厥志雖盛
負才實疎慕平準之理財師墾草之餘智蓋初不知立國
有本苛法當去而專以爲財之不富兵之不強也欲強兵
必先聚財欲聚財必先科歛乃其與聞名教夙盜虛聲進

洙泗所罕言用鄒嶧所深斥尼山如聞當鳴小子之鼓卜
式尚在恐請宏羊之烹於是盜窺陳編遠誣元聖依古興
造近仿巨君強古人以分謗笑前事之未工自詭遠謀排
斥異議新法旣立舊制益隳青苗過苛黎首重困避強擊
弱謬試熙河之兵求利反害乃致監門之哭豈非棟撓本
弱鼎折餽覆之咎歟是知智小者不可以謀大力小者不
可以任重樊可更也不當代以甚樊之法古可復也不可
誣以非古之制宋政總總本宜亟更神宗以英果之資念
憤恥之積痛國勢之不振求高賢以自輔不惑於聲色不
撓於羣議齊威烹阿國乃震懾苻堅用猛朝無阻撓夫非

大有爲之君負高世之志乎無如葉公好龍但覩僞物殷
浩一出竟誤蒼生太祖黃袍之疑懲之而不革神廟金甲
之志徇之而愈堅上高語夫王政下不逮夫霸道卽令殫
其材智就其績效徒木立信振鞅起之威發大農仰給比
桑孔之用饒而猜防未除綱紀不立頗牧弗用空念鉅鹿
元謨坐論欲封狼居財雖富無架入之計也兵雖強無指
蹤之人也封樁之聚徒供侈靡之費也甲乘之多徒爲美
觀之具也又况用虎冠之吏進狼貪之徒心計愧夫前人
手實及於微物哉卒之熙豐一變兆津橋之杜鵑章蔡迭
進促金狄之虜騎取魚竭澤乃無毫釐之效教猱升木反

致邱山之禍安石負宋宋何負於安石乎遂使後之人
者戒推腹心薄古者借爲口實稱先則昔詆儒生之迂濶
社倉保甲夸軍國之奇謀懲羹固非學步尤謬是又通識
罕覩而貽禍無窮也

春秋列國名臣序贊

夫雕虎嘯而清風起應龍翔而玄雲升伊昔聖哲之君必
有名世之臣醜嚳元化扶植人極匪賢弗毗靡才弗贊金
提鳥明琢磨皇風鼎飾鷹飛光輔盛治元會日降際遇實
艱彼蒼生才鮮熙天耀日之能惟士遇主歎旋乾幹坤之
力慨彼偉畧屈而小試或才足相萬乘而躑躅於蕞爾或
德可冠百僚而摧抑乎下位扼腕蒿目嗟我生之不辰歎
鳳傷麟撫昌運而已往然猶奮其智力就其績效上敦在
三之節下謳畫一之法雖徹瑱之愛僅流一方而紀常之
烈亦煒百禩斯亦濟時之舟楫幹國之榘矱矣有周東遷

大運中圯巖涓絕明王之夢尹武叢世卿之譏選舉久廢
漸達之鴻鸞乏采疆宇日蹙勺水之鱣鯨莫容是故代易
十四歲逾二百而王室諸臣罕可稱述列國髦傑莫登天
朝至於魯國一人僅聞禮器之觀農山諸賢空淹下國之
迹卒至問鼎覬位竊鉄被言乃知濟濟多士西岐所以維
新無陪無卿東洛所由守府得失之效不其偉歟夫璞玉
輝山不登明堂之用寶珠照乘匪特一國之光周棄其人
才効用侯國乃使魁能之士雄俊之姿韜彼鳳采上不得
揚于王廷困夫虎苛下不盡用於邦邑歌碩鼠者或扣牛
角厄養牲者乃鬻殺皮皆能攄其瑋材鬱爲時棟或襄匡

合之烈或著強霸之效蝸戰之國憑策力以殊廢興鵠舉
之徒覽德輝以決進退楚材晉用開市駿之風存魯亂齊
啟雕龍之辨七雄盛其軌而列國肇其端斯亦士貴於王
而賢益於國乎且經綸者才也際會者運也有才無運潛
龍不能階尺木有運無才蒙虎無以威百獸春秋諸臣稱
國器則不愧躋王佐則未能以彼錚錚終異蹇蹇器小非
儉乃在天下之才作法於貪且詆衆人之母彼二子者皆
明足以炤幽窻畧足以繫絕維然而首變舊章兆開乎名
法漸趨簡易禍極於鞅斯效雖收於眉睫獎乃見於身後
逮此以降一節乃優求其能潤色王業經緯大猷者固無

人焉然猶賴其匡末俗制頽波彌闕遺振衰弊使夫豐鎬
餘澤得延於獲麟之前桓文盛烈不遽致金虎之變挽日
下之勢竭其股肱亨雲雷之屯殫厥勇智軌轍旣易霸圖
肇興墜統如綫臣力益振以至納肝効忠化碧無悔白日
將墜泣揮魯陽之戈震霆勿驚憤挺飲飛之劍挂瓢之風
不墜於輓近采藥之義足化乎澆俗原其器幹與彼志節
雖道未方古猶遠邁漢唐矣蓋自隆周以來鳳皇翔岡振
鷺充庭兔罝顯彼閎天魚鹽舉夫膠鬲世選爾勞休戚與
共野處不匿秀髦咸烝爲周之楨並升夫殷士於斯爲盛
上姬夫唐虞遺烈未湮故家尙在雖或遁於空谷亦散見

於四方魚躍于淵文武能植其材飛鴻滿野春秋猶收其
效是知種桃李者蔭及數世蔚杞梓者材貽四鄰此所以
道息愈光且決而永潰也季友以兩社之忠開三家之始
馨烈雖茂裔嗣弗紹柳下三黜臧孫爲政雖不朽之譽取
高世祿而被賢之責難追鈇鉞矣晉之勦伯狐先實爲上
勲逮其中衰羊舌弗獲大用石甯兩臣忠能定亂史遽不
進僅可救亡故君子之多雖足重國而大臣之道首在薦
賢鄭有罕虎齊有叔牙維彼二賢見識知己晏客石父乃
失宣尼然墨者之言頗疑失實令尹三仕門孫並稱楚材
雖多先後並美入郢之難包胥乞援於外沈尹抗節於內

人好司馬并及葉公雖彼象賢亦推烏愛也夫恢瑰之才必垂景鐘之銘正素之士不惜崑玉之碎當時九州相君上士達節然如荀息孔父仇牧之殉國召忽彭生之授命士燮叔孫婼之効死子家羈之從亡在彼當日固屬歲寒之松傳之後世亦云風勁之草若目夷季札遜國稱賢近比曹臧遠追魯隱亦詎不可愧彼攘臂消其競心者乎語曰得人者昌失人者亡虞不用百里奚而亡秦穆公用之而霸闔閭用伍員而霸夫差殺之而亡是故良驥常有罕逢伯樂之識威鳳高翔必俟夔律之應乃自猜薄愈甚大義罔終范蠡浮於五湖文種墜乎一劍功同再造而身莫

保元吉桓文之風莫嗣管狐之勛不錄此世變日下而春秋之所以終也夫盛德弗泯光炤旂常先芬未寂文煒編簡贊美之義振古爲昭大漢龍興士衡振其瑋詞三國虎據彥伯奮其鴻筆矧夫才爲三代以上功著五伯之間論定聖門榮衰華袞豈可使緜世寢遠頌美弗傳朗耀漸淪光靈不屬者哉乃次其名臣各爲之贊魯八人季友曹卨展獲臧孫辰仲孫蔑叔仲彭生叔孫婁子家羈晉七人荀息狐偃趙衰先軫士會士燮羊舌肸祁奚衛四人石碯甯俞史鰌蘧瑗鄭四人考叔國僑罕虎游吉齊四人鮑叔牙召忽管夷吾晏嬰楚五人鬥穀於菟孫叔敖申包胥沈尹

戍沈諸梁宋四人孔父仇牧目夷樂喜秦二人百里奚蹇叔吳二人季札伍員越二人文種范蠡贊曰

赤雀沈輝火鳥墜彩皇輿雖遷玉步未改瓜剖分疆塵飛動海頌歇菁莪香鬱蘭茝道廢王朝光啟侯國列宿儲精羣英奉職各附驥尾爭攀鳳翼珠光競明玉采無匿宗邦秉禮寶祚中頽黨臺割臂桓宮忘哀偉彼成季支斯傾危在手有文賜田爰開破斧滅親寶刀殲魁三桓位冠兩社功推桓桓曹翽勇奮風雷匕首旣動邊關以恢圖鐘諫社文武兼才鄙彼肉食無謀可哈枳棘栖鳳疑爲不祥鴟鵂雖紛苞采彌光柳下三黜直道自昂袒裼非浼坐懷若忘

片言鼎重三篋書藏聖師百世身推道彰臧文擅名庸中
佼佼世傳諫節言重坊表鬯圭齊羅玉穀衛保藻山巢龜
鐘鼓樂鳥旣没不朽蔽賢非道瑕不掩瑜亦云國寶醴泉
芝草羌無根源煌煌駢角見重山川加人一等獻子稱賢
聚歛不畜美室匪愆惠伯殉主大節凜然身埋馬矢名失
麟編玉霜封條寒松乃現鸛之兆禍鷄門興變懿伯從亡
堅逾百鍊苦志執綫忠言規瑱復君未克從政奚羨雙琥
旣辭神龍不見叔孫多賢先穆後昭豹乃晚謬婚不私勞
爭幣魯社請冠霸朝見旌遺憾言幄徒囂一死自白三命
奚高魂魄去矣誰歌大招蘭以焚香玉以剖潔君命雖亂

臣心乃烈荀叔謀臣亦仗名節甫操寶璧旋傷金玦九原
弗慚六尺可挈青簡有煒白圭無缺廣厦肇闢匪材弗勝
雄圖鼎新匪人曷興狐趙佐霸冠倫魁能壺飡早潔投璧
晚矜鳩飛享從鶉尾機乘一龍旣奮五蛇同升三軍洸洸
元帥難得卻穀敦詩先軫尙德分田善謀公族橫擊蒙虎
鏤勳匹馬龕敵怒唾于朝歸元于狄文襄繼興父子著績
天下之寶不惟一方棄才於敵借兵賁糧秦用士會晉人
徬徨鞭策旣贈黻冕乃光赤狄種滅綠林盜藏擊杖訓子
穀烝尊王文子先見厚壙是防勝敵而懼速死乃祥奇材
輪囷徒爲桷榱叔向之見也於位卑射鵰悟主瘠牛伸威

貽書規僑徹備徹圍春秋是習學識振奇嗟彼羊舌喪於
豺兒祁奚乘駟親仇不遺赤族之禍白首同歸復仇定國
是謂純臣臣年雖老臣力方新燕飛送歸羊肩滅親寵祿
弗過大義曷伸紆策貴智抱忠貴愚長牂守國歔犬前驅
薄醢不死橐籥潛輸歌詩論祀詎曰真迂猛獸據山藜藿
不采賢臣在朝國命無改遽賢屢出史直近殆過闕有聲
如矢弗悔尸諫斯憤竈煬安在惜哉卷懷未作名宰寤生
君國大倫滅天不愧白日乃誓黃泉考叔純孝母子復全
舍肉悟主挾軼競前螯弧先登射矢下顛殺犬曷詛姦人
斯憐春秋多才誰爲領袖賢哉東里興自華胄攻盜振奇

成童挺秀旣聽虎帥不卹龍門孰殺始謗兒啼終奏黃熊
是辨鋌鹿母走瓘竽匪吝玉環弗授乘輿濟人登陴備寇
豈惟火烈治乃近王行無越畔校不毀鄉製錦勿使褚衣
有章聖門稱道霸國歛鉞亦有知己罕氏推長戶鍾得民
國棟稱良嗣者世叔荏苒是攘黃父論禮大言煌煌槃槃
大才歎深微管霸圖肇興舊法克纘君忘射鈞臣侈鏤盤
鄙黍阻禪包茅柔悍禮厚橐垂汲苦級短社鼠深患鹽蜃
謹算九合功鉅七子亂緩惟鮑知管猶虎授喬分金賈市
奉杯齊朝召忽彊武萬乘弗怵一葉生輕千仞節標受賜
雖永勁風獨高三人鼎足生死同昭權寵方爭避難在儉

平仲卑卑有幅自貶鹿裘以朝豚肩不掩費誦溥利枕股
非玷虎門端委牛山笑諂繆綬求賢書社詎險大臣之義
主亡與亡牧也殉閔父亦屬殤禍起督萬亂生子商正色
監義手劍叱強攻家墮族著門逢殃華袞特筆並美公羊
五伯迭興茲父最下楚毛讓泓鄩血丹社卓彼子魚職兼
司馬遜國守國神靈攸假與宋升降邑中之黔公粟善貸
火政莫侵桔弓轡逐削邑戍箴不貪爲寶千秋德音維楚
有材雲蒸杞梓於菟毀家亦云忠矣朝設脯糗位澹惓喜
嗟爾虎乳恐餒狼子孫叔良相薦由虞邱埋蛇陰德秉羽
深謀城平板幹水灌雩婁高梱俗變北轅功收始進掩口

末封搖頭廉吏可爲負薪終酬君親大倫惟義所處子胥
包胥復楚興楚臣懷存荆君慟越莽禍延蛇豕援乞蒲虎
雞次賞逃鵠倚功舉司馬授命句卑布裳毀舟失策城郢
知亡萬民之望篤生諸梁如父如歲云掩云傷定亂避位
方城之良好驚真龍直舉攘羊殺陵之敗蹇叔哭師棄彼
黃髮乃遇墨衰百里舉滕上侔莘伊龍尾虞滅牛口秦知
慷慨養牲悲歌伏雌有子不懈顯君西陲乾坤生才不遺
山澤於惟大賢德變蠻貊延陵翩翩名節赫赫審音知政
與縞贈客劍挂且許鉞交何責大雅不羣追蹤泰伯復仇
大義著在春秋吹篴吳市解劍漁舟臣報棄疾君忘姑浮

南郢鞭尸東門懸頭江濤馬奔宮露衣摳屬餓旣賜主恩
以酬前沈後揚皇天之祐羽翼旣成山河重秀起起子禽
稽山居守九術敵破四封國富夷光亂謀寶器致賂烏喙
共患狗烹曷救朱鳳銜圖乃不再鳴翠虬潤物復歸滄瀛
淵哉少伯犬寶發聲窮天格高極幽洞冥五行消息萬物
化生小試霸越三徙成名鑄金環封懷寶間行逸氣超世
千載誰爭世亂多才綱頽復振人競翔翬國思市駿象賢
舊族鳥集新進金版銘勳珠槃珥釁英英羣彥濟彼時艱
素王曾褒青史弗刪偉烈範俗古光照顏式此型鏡貞爾
河山

漢雲臺中興諸將序贊

君臣之際難言之矣冠履高下續堅之位既定股肱左右
毗贊之績遂著上塲下黷必將有以扶其傾綱頽維絕必
將有以繫其紐苟非魁傑曷佐戡定圖緯之符旣陳景風
之典斯舉是以豺螭武成乃崇茅土虎豹戎服亦賞金石
開國寶玉義著乎葵貢中興圭瓚光昭乎虎拜所以崇報
功德褒酬庸勳三五迭隆靡不由此道極數殫斯義煙暖
馭下者不以坦懷待物而切雷乘之震奉上者或以高勳
自詡而忘日贊之美凶隙斯構上下交失五戰入郢卒斃
鵠夷九術沼吳終厄鳥喙龍顏御世北煽尤酷信越菹醢

不勝冤憤布綰激變亦昧保全帶礪誓在皆成虛文旂常
功高反爲大戮以陰以雨常懼安樂之棄有初鮮終徒傷
患難之共鳥盡弓藏兔死狗烹秬鬯彤彤盧何其闊哉若漢
雲臺中興諸將者可謂懋功懋賞善始善終者矣世祖迹
奮白水珍握赤符霆擊昆陽則鴻烈慕聲電埽邯鄲則駿
民効足具袒憤之大度推置腹之赤心帝王有真鄙井蛙
之握嚙從容笑語懲黃龍之猜刻遂乃驅駕衆力鞭笞羣
雄鉞授四七亂寵百六東洛帝鄉富貴與共南陽故人優
閒自保其時豈無高密侯之敗績咸陽王之飛章寇君甚
得人心吳公隱若敵國然而雨雪之疑見睨卽消白日之

明浮雲莫蔽至於起兵主簿儼同父子之情璽書司徒不諱堯桀之語征虜旣沒存見夫人膠東受傷先慰遺腹甚乃豆粥厚意筍餌舊情珍甘盡於大官邑賞全夫福祿丈夫意氣睠貧賤之交故友共卧忘天子之貴一眚弗究八議可援不吝四縣之封豫防三公之責固宜杯酒釋柄宋祖愧其猜嫌凌煙圖形唐宗遜此恢豁者矣而諸將亦畏避權寵深執謙退青紫旣盛闔門養威丹鉛弗釋執經受學治家無驕貴之習牧民有愷悌之稱夫權勢之競有自來矣新故迭乘先後相質乃能韜此武節以贊文教遜彼新進若忘元勳龍姿婉變常儷同翻之景蛇輔悲歎不懸

宮門之書至於鄧氏各守一藝寶侯戒觀天文慕雕龍之
世禪比珥貂之累葉上無怏怏少主之慮下無缺缺噲伍
之心臣主俱榮身名並泰豈非三代以來曠世罕覩者乎
夫少康配天僅一臣靡周宣補袞惟藉仲山茲乃埽紫色
淫醜之鋒撲赤眉青犢之燄朱火沈而更暉蒼生擾而仍
定鱗集響應翼附爭奮興布衣而膺袞繡易武弁而調鼎
鉉卒使南宮圖象易世念雲臺之勳中興佐命羣論疑星
宿之應偉烈盛美輝灼世禩足使追往者繩其軌詔來者
慕其迹而圖畫斯煒贊頌尚闕亦尚論者所不能已也乃
依其本第序而贊之太傅高密侯鄧禹大司馬廣平侯吳

漢左將軍膠東侯賈復建威大將軍好時侯耿弇執金吾
雍奴侯寇恂征南大將軍舞陽侯岑彭征西大將軍陽夏
侯馮異建義大將軍鬲侯朱祐征虜將軍潁陽侯祭遵驃
騎大將軍櫟陽侯景丹虎牙大將軍安平侯蓋延衛尉安
成侯鮑期東郡太守東光侯耿純城門校尉朗陵侯臧宮
捕虜將軍揚虛侯馬武驃騎將軍慎侯劉隆中山太守全
椒侯馬成河南尹阜成侯王梁瑯琊太守祝阿侯陳俊驃
騎大將軍參議侯杜茂積弩將軍昆陽侯傅俊左曹合肥
侯堅鐔上谷太守淮陽侯王霸信都太守阿陵侯任光豫
章太守中水侯李忠右將軍槐里侯萬修太常靈壽侯邳

形驍騎將軍昌成侯劉植橫野大將軍山桑侯王常大司
空固始侯李通大司空安豐侯竇融太傅宣德侯卓茂贊
曰

列宿垂芒羣雄門野神應赤龍帝興銅馬矯矯虎臣愔愔
大雅賞鏤蘿圖慶延茅社鳥則擇木臣亦擇君冠負日月
威奮風雲避爵辭寵建囊脩文偉彼交泰集茲大勳燎火
炎炎佳氣鬱鬱扶桑未融孰先捧日於惟元功實首高密
髻年遇主弱冠投筆帷幄更籌鄼侯再出響震關河師行
紀律龍章雖褫鳳采無匿寵冠東京名保元吉絳侯少文
德茂安劉廣平驚彊亦兼勇謀晚定巴蜀先平薊幽鬼語

擊手蛙留洞矛主諒赤心兵行黃頭馬尾勢蜈龍驤功收
反敗爲勝以樸勝浮僞檄誦衆大勳誰侔武節焱逝必先
文事膠東勤學將相之器高言漢中際會幽冀眷此解驂
期爾展驥被羽克敵傷夷驚帝論功不言剽甲佐治勳少
方面經明大義兩虎旣和三侯參議虎生三日雄姿奮揚
驥志千里厯塊超驤好時按劍童年耀鉞抗論河北決策
南陽擊賊破胡走岑降張有志竟就其鋒莫當比烈厯下
剋平東方三世爲將威聲煌煌古者將才皆由循吏龕敵
以威澤民以惠雍奴堂堂文武兼備朱旗纓山赤伏踐位
比蕭堅鎮效藺屈意食輸驅駕諫挽龍轡嗜左成癖借寇

斯治民懷仁恩友感厚施江湖萬里荆益二州漢祚雖復
皇風未柔舞陽後服歸德早侯追戎秭歸圍豐黎已旣下
朱鮪乃平黃牛首破荆門神行漢涪秋毫不犯電鋒無留
星隕一劍廟祠千秋河洛旣定關隴後平烏合雖刺黃圖
榛荆陽夏閒說主簿振名龍乘賀夢菟肩進呈推鋒上黨
賜劍西征鼃池翼奮上林都成騎箕冀縣攀雲父城大樹
之德宏我漢京蕭曹元勳亦緣故舊潛龍夙好拜爵先授
鬲侯尚儒舂陵邂逅日角謙語風塵奔走買蜜追念舍講
更候垂翅加慰受降見宥不存首功但取印綬改王去大
偉矣上奏穰苴整肅卻穀雍容將畧獨邃君恩以鴻潁陽

全德直經奉公口血破賊肘石誅豐覆蓋隴下投壺軍中
黃門饗勞玄甲飾終乘輿隕泗學士論功建立孔後卓然
儒風炎精更輝寶由二郡闕如突騎陷彼堅陣櫟陽安平
北州之俊驃騎名崇虎牙力振南絲霧散西防煙燼衣繡
白榮編竹斯奮叛臣齒擊瘡鬼卧鎮國共功名人懷威信
漢重吏事曹掾多才安成呼趨戰奮衆摧人駭異貌天生
奇魁服叛魏郡犯顏天階東光獻馬舉族偕來焚廬載木
傳弩銜枚赤丸先戮朱英何猜匪獨武畧郡民見懷黥彭
侯王乃出羣盜下江綠林雄名先噪朗陵運奇駱越爭勞
益馬張旗謀同增竈揚虛歸心被甲龕暴嗜酒故達敢言

匪倣將鳴龍劍志埽狼羆抵掌書上銷鋒詔報南陽諸劉
實爲宗英安衆烈烈慎侯挺生射犬早至驃騎後榮墾田
難問詰吏何明全椒解印步負懷誠設壇祖餞期門從征
困賊高壘傳烽井陘主念勤績邊思政聲帝信赤符官崇
元武阜成之升野王是撫念功檻車平賊屯聚胡作水神
乃爲渠苦祝阿賜衣拜將疆弩短兵殲魁清野困虜專制
青徐威行齊魯惠此貧弱清彼盜藪中國鼎沸北夷始驕
高柳煽亂塞榆蕭條參遽洸洸中堅自豪廣平鷹揚沛郡
虎超狼煙夜炤鴈塞天遙屯田旣成虜馬失驍昆陽毀族
江揚功高始憊盟眉終榮珥貂逐鹿紛然從龍貴早疾風

震盪誰爲勁草合肥左曹洛城先埽孤軍無援食菜自保
富波慷慨河冰天造瑞比魚舟士盡鳧藻不驚酒樽乃築
亭堡潁川之良皆云國寶神龍失水幾困泥蟠九縣颯迴
孤城獨完阿陵作檄炬火彌山馳騎鉅鹿斬鯨邯鄲蹇蹇
中水忘親懷丹斷髮俗變禮容民歡槐里共事南陽力殫
三傑協心熊羆桓桓興邦喪邦一言乃判先幾難明朗照
誰斷靈壽廷對迺決成算妻子弗顧神明攸贊昌城聚兵
宗戚捍難心結瘦揚系隆聖漢密縣死事河朔平亂擬彼
傅靳俱爲良幹茫茫宇宙誰測天人龍蛇紛糾孰辨僞真
山桑固始玄鑒洞神或起草澤或興薦紳艱厄結好尊榮

締姻南方不憂西域益振叱咤霄漢拔身風塵舉義知命
齊膺上勳海水羣飛節義乃見覩幾蟬蛻識主豹變安豐
惻惻神照獨電據地河右奉書漢殿觀符如鏡邪說不眩
脫屣千里卑躬北面蹇人上天掌文自銜偉彼信效獨承
殊眷盜據天位人飲狂泉風教日薄王靈曷宣斷斷宣德
爲時大賢馬失不辨蝗災弗延汙濁力避龔鮑比堅終繫
白駒重覩青天式閭立館新政所先化彼虓悍隆茲几筵
日月麗天羣星相盪重離繼照六合同朗麟閣追美鴻臚
促上赤縣澄清白茅懋賞如彼廣廈勞楫是仰如濟巨舟
剴剴必倣臣靡矜驕主厚恩獎蒼赤正度丹青垂象

與李荔蓀書

夫雄于雌，鏌眈神物之終逢。松茂柏悅，欣共氣之相引。誼篤於故，則白頭如新。情孚於同，則丹慊並照。韓孟追逐，有願爲雲。敏惠相思，夢尋迷路。是故蟲鳴螽躍，和以聲也。虎風龍雲，觸以氣也。寄通靈臺之下，遺跡江湖之上。賢達古義，不偉爲烈。歟！足下水堅鍊骨，鏡古照神。處餐霞之貧，勵映雪之志。高文通坐視漂麥，遜此專勤。朱翁子行歌負薪，忘其困悴。果能揖讓終賈，含咀陸潘。聲光隱然，羽翮益奮。邇聞吾鄉，啟講舍聚鴻生。各抱遺經，紹明絕學。足下諸子，駢靳其間。談天雕龍，齊稷下之論議。林宗賈虎，漢太學之

聲名相與挾張鴻文被飾旨義變楚風之樸僊闢斯道之
榛蕪甚盛甚盛鄙人不才僻處天末資章甫於文身之國
奏雅琴於鳥喙之君聞見日陋性靈彌錮復迫塵網往來
越吳呼吸蛟龍吟嘯鷗鷺溷跡漁商之內鳴榔江海之中
湍瀨驚心煙霜楚暘碧山曉矗則神飛重霄白浪夕舂則
魄墮滄海若夫客星高士潮神大夫釣臺壓江奔濤轟石
時或租船詠史澤畔行吟弔山川之非昔懷古人而不見
雖足濬發神識振觸積感然韞鎖繫其前風濤震其後鳥
集菰逝衡流方羊間陳侘詞無關大雅是則專門之業自
此而墮吾精易銷因之坐槁者也頃還婺城踰伏山谷歲

聿云莫風悲斷肌名山洞天無復石羊之蹟中原文獻非
同泥馬之時塊然獨居侘傺誰語慨此殊俗彌懷故人昔
與吾子弱冠慷慨獬兒總角交公瑾於當年雞聲起舞恐
祖生之先我爾時壯志上干虹蜺方自以謂王登貢喜我
黻子佩不難蕩海嶽凌滄洲矣何知羽翮莫奮鋒距靡加
長謠噴薄華色漸減子嬰苜蓿坐子敬之青氍僕嗟轉蓬
懷胡威之匹絹曹子桓行年三十早類老翁潘騎省已見
二毛彌傷秋興足下視僕豈嘗纓情好爵羈志浮榮者哉
顧嘗以爲君子之道或出或處聖人之行一龍一蛇抗志
千秋必有一得今進不能雲臺橫議獻一說以策名清時

退猶冀名山著書成一家以傳之後世乃徒悠忽以苟巖
年空效梁生登岳之謠殊深孔父逝川之歎久欲作報而
情緒殊惡操翰復輟乃至再三知君惓惓畧陳近况望崇
明德益愛春華慎護波潮更俟清晤湘江草綠春水方生
將速歸艗重申欵識

重修屈賈合祠啟

夫蕭艾滿握不識迷迭之芬鴟梟盈庭反驚歸昌之律俗
翫所見則罕覩者非珍體安所習則言奇者見棄卒之閱
世論定風流乃彰讒夫煙消馨烈彌茂蘭蕙旣謝惆悵九
畹之間鳳皇高翔徘徊千仞之下而俎豆蕪曠丹青歇剝
望古之士慨其閔矣長沙古城太傅故宅後以靈均共祀
合爲屈賈之祠誠以磨蝎同宮囚鸞比翼曠世相感乃投
湘水之書擬人於倫遂合龍門之傳若乃稽其行事比其
際遇異同之迹可畧而言夫黃棘策施藍田兵辱懷王不
悟見欺虎狼之威頃襄忘仇有愧大鳥之對悲感亡國義

激懷沙太傅生遇清時何宜痛哭不知虞廷交儼猶戒丹
朱鄉嶧責難不如堯舜況其時黃頭並進亦傷聖德絳侯
少文初非賢輔中行反覆何異張儀三孽厝薪詎殊戰國
愚諛見謂安治智士所爲累歎大息之書非過激也三閭
楚之同姓正則裔出高陽邱墓所依莊舄病猶思越肺圻
旣託非子死欲存韓堵敖不長休戚當共太傅洛陽年少
宜異宗臣不知知己之恩武侯由是感激國士之遇豫子
報以殺身當其時宣室求賢歎爲不及列侯就國發自下
僚議任公卿始若左徒見用毀生絳灌繼似上官進讒竊
比之意非不倫也嗟乎江魚腹葬神恨驂虬鵬鳥愁生魂

隨墮馬問天不語空訴牢愁弔水何知難明忼慨遂使女
蘿薛荔九歌悲山鬼之遺沅芷澧蘭萬古稱騷人之國縣
世寢遠靈宇就頽蕭條濯錦之坊寂寞陶公之廟古柑葵
絕莫留橘頌之香舊井湮沈慨想王明之福念茲芳烈宜
用尊崇所當祓飾荷堂塗丹蘭楹崇璇題以納月新傑構
以偃虹遷客寓公並秩豐祀楚豔漢侈更薰古香庶將丹
荔黃蕉披髮向大荒而下寒林秋草識我昭詞客之靈表
風教於茲邦益深愛國忠君之志仰芳徽於往哲非徒頡
香拾豔之才云爾

告伍公廟文

予讀史至伍大夫傳竊嘗偉其志節日者游越地登吳山徘徊古祠肅瞻遺像乃握衣再拜而使祝薦文曰惟公早迫費譖晚困嚆讒壯志激於仇讐大節完乎忠孝雖屬鏖賜死不載獲麟之經而挾弓復仇見褒公羊之義慨自熊居不道方城蓄疑燕婉之求新臺興刺公感激家難見知英主乃構入郢之舉卒雪戴天之冤其意氣之盛可謂壯哉何期燕昭夙世昌國見疑齊潛晚驕穰苴爲戮宮中荆棘不記立庭之言墓前櫬材寧懸東門之目卒之不忍亡國甘裹革以浮江下報先君化冤禽而塞海其孝可謂全

矣其忠可謂至矣或謂君子不適仇國交絕不出惡聲何
乃狐丘之戀不操土風龍鐘之破甘爲戎首不知公因太
子致禍卽偕太子出奔義本從亡情非反噬向使重耳歸
而狐偃授璧小白入而鮑叔將車亦惟取彼譖人固無仇
於故國初志不遂儲君見誅吳光懷吞併之心楚壬乃秦
嬴之子衛朔得國生由鶉鵲之姜丕豹奔秦欲獲雄狐之
主假手枯骨藉報父兄奮撻墓之鞭刑恣舍宮之狄道虧
君復義以辭吳子曰暮途遠以謝王孫倒行逆施公自知
之矣或又謂明哲保身屢諫當去胡效洩冶之狷不作曹
羈之奔不知公之於吳形雖鳥集誼同魚水荀叔竭力知

無不爲武侯受遺死而後已君旣報臣之怨臣宜奉君以
身攜李戈傷夫椒憤發向使乘其朝氣滅此讐邦獻突厥
之俘雪恥高祖函梁君之首還矢先王豈不臣主俱榮身
名並泰乃哮虎空怒爲虺弗摧妖狐內蠱社鼠潛煽卒致
好冠之霸敗於垂成端委之澤斬於一旦公神燭禍亂身
繫存亡何忍見霧露之霑衣遁草間以求活哉今者山川
非昔潮波自湧走吳宮之麋鹿珠幌爲塵飛越殿之鷓鴣
錦衣安在而公英風颯爽像設巍峩北顧昭關篴聲夜泣
西瞻會計劍氣朝寒二國煙銷千秋廟食鴟夷榮於龍藻
搏土壽於良金如公者亦可無恨濤驅長聲蘋薦者矣錫

瑞掩卷興懷瞻祠起慕肅陳瑣語上瀆神聰望江頭白馬
之濤千萬世猶思報越想夜半靈旗之舉第一山自合稱
吳

游空靈峽記

泝湘而上有空靈峽載在酈注一名空冷岸狹束江湍怒
轟石乃有巖岫枕乎荒江登艫遠眺若剖巨瓠中裂一縫
浮爲匏樽又謂曰孟俯仰各異勢未及合呀然中開徒觀
其摩豁表狀嵒嵒蘊靈壯逾獅蹲吐舌舐談雄壓虎踞排
牙巉巉鬼斧之刃剖而橫分巨靈之掌擘乃中斷則伊闕
之鑿無其險也五丁之開無其奇也若乃入其腹窮其異
躡足磴道游心環中探虎吻以極深效蛇伏以穿穴狹不
覺猛人方摩肩淵無嫌幽火靡秉炬耳目異觀人境殊隔
靈宇斯闢精廬肇啟中乃佛殿內爲禪堂燈光長明像設

莊麗有僧三四終年穴居游人時來禮佛而去月逾仲秋
膜拜衡嶽過謁盡敬數尤夥够寶座之後乃有小池澄泓
齋漆下通大江廣不數尺深至無際巖罅生泥是挺綠竹
根怒裂石枝脩拂雲青碧森捎下映江表循堂而左有亭
翼然中祀杜陵榜以詩聖以彼老作賓客沒猶江湖晚過
空靈眷此霞石欲託長嘯以榮吾居可謂計畫無俚生民
至阨乃綿歷千祀光燄萬丈表斯遺蹟於焉薦馨是知陵
石有遷辟華不沒汙汙素浪感慨係之矣妙盡所歷相羊
回舟反顧巖顛天然雄麗哆彼張口若將吞舟吐吸煙霞
漱飲波浪領彼佳處還期後游回舟援毫且誌崖畧

序

夫西河授經光文學之選蘭陵傳藝作禮智之賦發辭炳
曜燦著簡筭陳義宏大實爲椎輪乃知玉版金鏤先顯陰
陽之儀四始五際上通天人之故龍蹲闡祕尼山匯其宗
虎觀通德炎漢隆其業宗聖立旨敷章賁華斐然經術蔚
爲文詞然邵公學海注言深晦高密經神箋語艱奧號爲
樸學匪尚藻麗故儒林所紀罕覩縉製藝文所志別錄詞
賦若揚馬蔚興已虧雅頌曹王傑起更失風騷魏晉而下
隋唐而上衆制鋒起源流閒出潘陸孫許振采色於前顏
謝江鮑標芳塵於後莫能討源禮樂詎足敷讚聖旨蓋經

學文章道本相輔各盡所長尠能兼善繫古以來恆是憾
矣鹿門夫子長沙博士湘水經師琅邪授禮實師曲臺穎
川受書遂章齊學金絲騰響服膺口授之遺球鐙載和豈
撫航頭之字博徵青簡疏證大傳詳搜石室信爲今文祖
述素王存微言於公穀增改內傳歸罪案於劉歆書惑經
申左之篇洗黨同妒真之陋豈徒孝經作疏攷石室之注
本鄭志撰證表東家之定論哉夫更生論文必徵於聖稚
圭勸學每尊於經良以佩實銜華迺流席珍之響稟式酌
雅猶潤千里之河斧藻羣言斯吐納珠玉鎔鈞六藝斯燦
爛符采昔咸墨著頌九招乃歌箕虞勒銘五聲以聽功在

表揚體歸贊美風陵著草春皇始創龍書九疑白雲潢陽
猶傳玉厯逸聞綿邈莫考禪通古禮搜羅每存識緯用摘
祕籍上煥宏功若乃祖龍扇燄二漢興規蒼鵝出地五胡
亂晉藩鎮之禍旣奪唐統金元之寇終移宋社變青苗之
法徒懲羹而吹齋恍黃袍之加致矯枉而過正三代之制
旣壞於秦漢唐之規又隳於宋卓見今古允爲定論非夫
洞達經濟深識興衰探原吐辭彌綸彝憲安能組織英華
發輝史志乎是知振葉尋根必正末而歸本窮高樹表貴
體經而原道遠景先哲總覽淵構莫不通經以致用因文
以明道夫子宏深典籍彪炳華藻故能上方前作獨振近

俗至於遊覽所及山川能說託興有在靈臺寄通斯又元
嘉之響正始之音足以邁儀鄭之雅篇繼船山而稱述者
矣觀久蒙甄鑄獲覩戶庭城陽內史忝列申公之門梁國
敬公愧有勵學之著每經啟告俾識源流賈嘉能言庶參
談經之席貞白妙製敢效摠持之序云爾受業夏敬觀謹
譔